

DAAGLIKSE GEBEDSGIDS – APRIL 2010

Donderdag 1 April 2010

Gebedsfokus op die Wêrelddag van Gebed: Dra Luxemburg, Macau, Macedonië en Madagaskar in gebed aan die Here op. Bid vir 'n honger en dors om God se Woord te bestudeer, te bid en te verkondig.

Beskou die lewe in en deur God: Hoe vergewe ek myself?

Vir die meeste van ons is die heel moeilikste ding om te doen, om onself te vergewe. Wanneer jy iets verkeerd gedoen het, is daar geen manier waarop jy dit ongedaan kan maak of kan verander nie. Baie mense word baie kwaad vir hulleself en vind dit onmoontlik om hulleself vir hulle foute te vergewe.

Prakties: Die enigste manier om jouself te vergewe is om vir die Here te vra wat Hy oor hierdie saak sê. Nadat jy God om vergifnis gevra het, is dit belangrik om die sonde/ding wat jy verkeerd gedoen het, te skei van jouself as kind van God. Paulus skryf in **Romeine 7:19-21** oor hierdie geheimsinnige, voortdurende stryd in die innerlike mens: *Die goeie wat ek wil doen, doen ek nie, maar die slegte wat ek nie wil doen nie, dit doen ek. En as ek nou doen wat ek nie wil doen nie, dan is dit nie meer ek wat dit doen nie, maar die sonde wat in my woon. So vind ek dan hierdie wet in my: ek wil die goeie doen, maar al wat ek doen, is die slegte.*

Gebed: Hemelse Vader, ek besef dat U my vergewe het vir hierdie ding wat ek gedoen het. Ek sukkel om myself te vergewe. Help my asseblief om myself deur U oë te sien. Ek kies in U Naam en met U hulp om myself te vergewe. Ek neem nou 1 Joh.1:9 vir myself, en glo dat ek van alle ongeregthede gereinig is.

Gebedsfokus op Moriabyeenkomste by Polokwane

Letterlik honderde duisende mense van die ZCC gaan by Moria byeenkom vir die Paasfeesviering. Bid asseblief teen enige vorm van misleiding en dat Jesus as die enigste Verlosser erken sal word. Bid dat die skares 'n duidelike begrip van die Drie-enige God; Vader, Seun Jesus Christus en Heilige Gees sal kry.

Gebedsfokus op die Wêreldbekersokkertoernooi: Veiligheid

Bid dat besoekers aan Suid-Afrika veilig sal reis en dat daar geen voorvalle van misdaad, aanranding en roof, kaping, moord of noodlottige ongelukke sal wees nie. Bid dat die polisie en alle sekuriteitspersoneel in staat sal wees om alle situasies met groot wysheid en regverdige gesag te hanteer, en dat hulle self ook veilig sal wees.

Vrydag 2 April 2010

Gebedsfokus op die Wêrelddag van Gebed: Bid vir Malawi, Maleisië, Maledive en Mali. Vra vir 'n toename in dag-en-nag-gebed in elke gehuggie, dorp en stad.

Gebedsfokus op Paasfees: Goeie Vrydag

Vandag is Goeie Vrydag. Bid dat God vandag die harte en verstand van miljoene mense in Suid-Afrika sal aanraak en hulle 'n hernude besef sal gee van die ontsaglike geskenk van lewe wat hulle ontvang het. Vra dat baie God se genade sal verstaan. Bid dat baie oë oopgemaak sal word en dat duisende van die duisternis na die lig sal draai – weg van die mag van Satan na God, sodat hulle vergifnis van sonde sal ontvang en 'n plek onder diegene wat heilig gemaak is deur hulle geloof in Christus (**Hand.26:18**). Kerke in swart gemeenskappe vier van vandag tot Sondag 'n fees wat hulle *Pasika* noem. Bid asseblief vir 'n spesiale aanraking van God tydens hierdie byeenkomste.

Artikel: Onthou die fonteinte van herlewing van ouds: 3-12 April 2010

Terwyl ons die 150e jaar herdenk sedert die 1860 herlewing in Suid-Afrika, moedig ons mense aan om met hernude erns te bid vir herlewing in ons land. Vanaf 3-12 April nooi ons Gelowiges vanuit al daardie dorpe en stede wat oor die afgelope 350 jaar herlewing in Suid-Afrika beleef het om spesiale gebedsinisiatiewe te begin, om God te vra om Hom weer oor ons te ontferm en weer herlewing in hierdie dorpe te gee.

By *Jerigo Mure* kon ons 74 stede en dorpe wat herlewing beleef het oor die afgelope 150 jaar, opspoor. Daar is seker meer, maar hierdie is dié waarvan ons op die oomblik weet. Die lys is op aanvraag beskikbaar. As jy weet van herlewing in dorpe wat nie op die lys is nie, laat asb vir ons weet sodat ons dit kan byvoeg. Jy kan ons ook kontak as jy wil weet of daar alreeds iemand van jou dorp of stad is wat te kenne gegee het dat hy/sy betrokke wil wees by hierdie inisiatief. Kontak Anneke Hanekom by tel.: 012 365 3213 of faks: 012 365 3214 of e-pos: info@global24-7.org

Wat om gedurende hierdie 10 dae te doen:

1. Vind 'n groep mense (verkieslik van verskillende denominasies) en beplan om elke dag vir 10 dae lank te bid vir jou dorp/stad. Jy kan saam met ander die gebedsaanwysings in die *Jerigo Mure* gebedsgids gebruik.
2. Dank die Here vir Sy groot dae in die verlede en vra Hom om dit weer in jou gemeenskap te doen. (**Jes.64:1-5; Ps.85:6**).
3. Lees **Handelinge 2:17-21** en bid volgens hierdie verse dat God weer Sy Gees oor jou stad/dorp sal uitstort en die ou bronne van herlewing weer sal oopmaak.
4. Waar moontlik oorweeg dit om 'n 24/7 gebedskamer of gebedsmuur (skedule) op te stel om die hele 10 dae lank te bid. Oorweeg 'n sentrale plek waar alle kerke kan saamkom om te bid.
5. Besoek weer die verskillende plekke in jou stad/dorp/gemeenskap waar jy weet vorige herlewings begin het. As jy onseker is, kontak *Jerigo Mure* of doen 'n bietjie navorsing oor die geskiedenis van jou gemeenskap.
6. Neem tyd om die Here te loof en te aanbid vir Sy groot dae. (**Num.21:17; Jes.12:3**).
7. Kom ons verneder ons weer voor Hom. Vra vergifnis vir die sigbare sondes van die dorp/stad en die gebrek aan toewyding aan die Here. Bid dat Hy weer die gemeenskap sal besoek.

Saterdag 3 April 2010

Dag 1: Onthou die fontein van herlewing van ouds

📖 **Jesaja 12:2-3:** *God is my redder; Ek vertrou op Hom, ek is nie meer bang nie. Die Here my God is my krag en my beskerming; Hy is my redder." Met blydskap sal julle water skep uit die fontein van redding.*

💎 Ervaar jy nog steeds die vreugde wat jy gehad het toe jy Jesus die eerste keer as jou Saligmaker ontmoet het? Of het jy moeg en selftevrede geword? Laat die Heilige Gees toe om jou hart te ondersoek. Bely enige selfvoldaanheid of apatie in jou verhouding met die Here Jesus. Vra dat Hy jou hart weer met vreugde sal vul, ten spyte van moeilike omstandighede waarin jy jou moontlik bevind. Gee jouself aan Hom oor met die absolute vertroue dat Hy weer jou verlossing sal wees. Bid dat die Kerk opnuut in die Here sal juig as gevolg van Sy verlossing.

Gebedsfokus op die *Wêreldbekersokkertoernooi*: Kaartjies

Mense wat nie kaartjies vir die wedstryde kon kry nie, sal by amptelike *FIFA*-ondersteunersparke op grootskerm-TV's na die wedstryde kan gaan kyk. Bid dat daar ook by hierdie plekke orde sal heers. Kuberkriminele beskou belangrike sportgebeure as 'n gulde geleentheid, aangesien mense al hoe meer geneig raak om kanse te waag en kaartjies deur ongemaagtigde kanale te koop of die beloftes in ongevraagde e-posse te glo. Dit kan beteken dat aanhangers met nuttelose, vervalste kaartjies bly sit. Dit lei ook tot die diefstal van kredietkaartbesonderhede en

verskaf geld vir georganiseerde misdaad. Bid dat sodanige optrede aan die kaak gestel sal word en dat mense op hulle hoede sal wees wanneer hulle hulle kredietkaartbesonderhede vir iemand anders gee.

Sondag 4 April 2010

Dag 2: Onthou die fontein van herlewing van ouds

📖 Spreuke 25:26: 'n Fontein, 'n put waarvan die water vuil en stink geword het, so is 'n regverdige wat hom tot 'n val laat bring deur 'n goddelose.

❖ Baie Gelowiges word moeg of ontnugter as hulle nie 'n antwoord op gebed sien nie. Dit is omdat ons soms vooropgestelde idees het oor hoe God ons gebede moet verhoor. Bely dit teenoor God as jy Hom op enige manier beperk het. Gee jou gedagtes en verwagtings aan Hom oor en vra Hom om op Sý manier te werk, soos en wanneer Hy wil. Bid dat die Kerk van alle goddeloosheid gesuiwer sal word en dat dit verkwik sal word. Bid ook dat diegene wat moeg geword het, weer met krag en volharding sal opstaan.

Beskou die lewe in en deur God: Hoe vergewe ek God?

Een van die moeilikste dinge om te erken is dat jy vir God kwaad is. Dit gebeur tog baie maklik. Wanneer 'n ramp ons tref en dit vir ons moeilik is om te verstaan waarom iets met ons gebeur het, is ons geneig om iemand te soek om te blameer. Omdat ons voel dat God ons moet beskerm en seën, is ons eerste reaksie dalk om te vra waarom Hy toegelaat het dat iets slegs met ons kon gebeur. Ons vra vrae soos: Waar was Hy toe ek verkrag of mishandel is, of toe ons gekaap of beroof is?

Prakties: Die enigste manier is om aan Sy voete te gaan sit en Hom te vra om vir jou te wys waar Hy in daardie situasie was, om die waarheid oor daardie baie moeilike situasie wat jou so pla, aan jou te openbaar soos wat Hy goeddink. Dan is dit ook belangrik om genoeg tyd saam met God te deur te bring, totdat jy agterkom dat jy Sy stem oor hierdie saak duidelik begin hoor. Satan wil baie graag hê ons moet glo dat God nie daar is vir ons nie, ons nie sal beskerm nie. Bly praat met God totdat jy Sy hart oor hierdie saak verstaan. Dit mag wees dat jy nie 'n duidelike antwoord kry nie en dat jy 'n doelbewuste besluit moet neem om God te onthef van enigiets wat jy teen Hom hou. Dit is so eenvoudig soos dit. Hy is jou beste Vriend, sonder Wie jy nie kan leef nie; maak seker dinge is reg tussen julle twee.

Gebed: Hemelse Vader, ek dank U dat U U hart oor hierdie saak aan my geopenbaar het. Help my asseblief om U mening oor hierdie situasie duidelik vanuit U Woord te verstaan. Ek het berou omdat ek U kwalik geneem het, en sodoende onvergewensgesindheid in my hart teenoor U gekoester het. Ek kies om my grief te laat vaar. Ek kies om U nie langer in my hart te beskuldig van dinge wat U Woord duidelik sê U nooit sal doen nie. Vergewe my asseblief hierdie sonde van beskuldiging en onvergewensgesindheid teenoor U. Vul my hart weer met U vreugde. En help my om U te bly vertrou soos 'n kind, want U is my Vader.

Fokus op Paasfees: Paassondag

Die meeste Christene in die Westerse wêreld vier vandag **Paassondag**. Die eerste Paasfees is deur die Israëliete in Egipte gehou. God wou hulle vrystel van Sy toorn en oordeel toe Hy deur Egipte gegaan het om die eersgeborene in elke huis dood te maak. Maar hulle moes glo en Sy opdrag uitvoer. God het gesê: *Die bloed aan die huise waarin julle is, sal 'n teken wees: waar Ek die bloed sien, sal Ek die huis oorslaan, en die vernietigende slag waarmee Ek Egipte gaan tref, sal julle nie tref nie (Eks.12:13)*. Vandag, 2 000 jaar na Christus se geboorte, weet ons Jesus is doodgemaak as die finale offer vir al die sonde van alle mense. Bid dat Christene God sal loof omdat Hy Sy Seun, Jesus Christus gegee het om vir ons te sterf. Bid ook dat die ongeredde mense Jesus as die gawe van die Ewige Lewe sal aanneem. Ons verheerlik God vandag vir Jesus Christus as die geloofwaardige getuie, die eerste wat uit die dood opgestaan het, en die heerser oor die konings van die aarde (**Op.1:5-6**).

Beplan vooruit vir die *Wêreld Biddag van Gebed* op 23 Mei 2010: Webruimte: www.globaldayofprayer.com

Maandag 5 April 2010

Dag 3: Onthou die fontein van herlewing van ouds

📖 **Jeremia 2:11-13:** *Het daar al ooit so iets gebeur, dat 'n nasie sy gode verruil het, selfs al was hulle geen gode nie? Maar my volk het My, hulle magtige God, verruil vir gode wat nie kan help nie. Selfs die hemel moet daarvoor skrik en beef en sidder! sê die Here. My volk het twee sondes begaan: Hulle het My, die bron van lewende water, verlaat, en hulle het vir hulle waterbakke uit klip gekap, waterbakke wat gebars is en nie water hou nie.*

💠 Het jy jou tot jou eie planne of programme gewend omdat jy moeg geraak het om op God te wag? Bely enige werking van die vlees wat jy gebruik om God te "dwing" om herlewing, redding of verlossing vir jou of vir ons nasie te bring. Laat vaar die pyn van die verlede, jou trots of selfvoldaanheid oor eie prestasies, en gee jouself opnuut oor aan die Heilige Gees se leiding. Vra dat die Kerk in lyn sal kom met God se plan vir haar, die samelewing en ons nasie.

Gebedsfokus op verkiesing: Algemene verkiesing in Soedan

Soedan hou sy presidensiële en parlementêre verkiesing van 5 tot 12 April 2010. Die heersende *National Congress Party* beoog om stemme te trek deur beperkings op Christene in die noorde te verslap. Daar was geen berigte van Christene wat vermoor of ontvoer is nie en geen kerke is in 2008 aangeval nie (jongste beskikbare syfers). Moslems in die noorde wat belangstelling in die Christelike geloof getoon het, is egter sterk onder druk geplaas om daarvan af te sien. (Webruimte: <http://www.opendoorsusa.org/> of http://en.wikipedia.org/wiki/Sudanese_general_election,_2010). Bid vir die verkiesings wat vandag begin, sodat mense nie hulle lewens in geweld of bloedvergieting sal verloor nie. Vra ook dat die Here Gelowiges sal opwek om dag en nag namens hulle nasie voor Hom te staan.

Dinsdag 6 April 2010

Gebedsfokus op Wêrelddag van Gebed: Bid vir Malta, Martinique, Mauritanië en Mauritius. Vra dat invloedryke leiers hulle tot Jesus sal bekeer.

Dag 4: Onthou die fontein van herlewing van ouds

📖 **Genesis 26:12, 18:** *Isak het in daardie gebied gesaai, en daardie jaar het die saad honderdvoudig geskiet. Die Here het hom voorspoedig gemaak ... Isak het toe die putte oopgegrawe wat in sy pa Abraham se tyd gegrawe is en wat na Abraham se dood deur die Filistyne toegegooi is.*

💠 Onenigheid en jaloesie in die kerk is 'n seker manier om die Heilige Gees se werking te blus. Laat die Gees van God toe om jou hart te ondersoek. Bely enigiets wat verdeeldheid tussen jouself en ander Gelowiges veroorsaak het, of dit jaloesie, afguns, kritiek, woorde of dade wat seermaak of wat ookal is. As jy iemand moet vergewe of ander moet vra om jou te vergewe, doen dit vandag en raak versoen. Vra dat die Here die fontein van Sy Gees in jou en in die Kerk sal oopmaak, sodat die lewende water vrylik kan vloei.

Woensdag 7 April 2010

Gebedsfokus op Wêrelddag van Gebed: Bid vir die Mayotte-eilande, Meksiko, Mikronesië en Moldawië. Vra dat mense hulle gedagtes aan God se waarheid sal oorgee.

Dag 5: Onthou die fontein van herlewing van ouds

📖 **Psalm 36:8-10:** *Hoe kosbaar is u trou, o God! U beskerm die mense wat by U skuil. In u huis geniet hulle oorvloed, U laat hulle drink uit die strome van u goedheid. U is die bron van die lewe, deur u lig lewe ons.*

💠 Verbly jy jou nog in die Here Jesus Christus? Die Psalmis skryf dat ons ons vreugde in die Here moet vind, en dat Hy ons op ons pad sal lei. Kom voor die troon van God met slegs een begeerte – om gemeenskap met Hom te hê. Onthou alles wat Hy in die verlede vir jou gedoen het. Prys Hom en laat jou hart toe om hom te verlustig in die oorvloed wat Hy gegee het. Vra dat Hy jou tot so 'n mate sal vernuwe dat jy weer jou blydschap in Hom en Hom

alleen kan vind. Bid dat die Kerk weer geken sal word aan en gerespekteer sal word vir sy liefde vir Christus en alle mense.

Donderdag 8 April 2010

Gebedsfokus op Wêrelddag van Gebed: Bid vir Monaco, Mongolië, Montenegro en Montserrat. Vra dat mense hulle tot God sal keer.

Dag 6: Onthou die fontein van herlewing van ouds

📖 Spreuke 14:27: *Die vrees van die HERE is 'n fontein van die lewe, om van die strikke van die dood af te wyk (OAV).*

❖ Om die Here te vrees beteken nie om vir Hom bang te wees nie, maar eerder om die moontlikheid te vrees dat Hy Sy teenwoordigheid aan ons mag onttrek. God is aangetrokke tot 'n oorgegewe wil en tot iemand wat geloof in Hom het. Is jy gewillig om saam met God te stap? Wanneer God so 'n opoffering vra, sal Hy ons ook die genade daarvoor skenk. Verootmoedig jouself voor Hom en vra dat Hy Sy Gees oor ons sal uitstort, sodat ons reg kan verstaan wat dit beteken om Hom te vrees, eerbied vir Hom te hê en godvresend te leef. Bid vir die herstel van godvresendheid in die Kerk in Suid-Afrika. Bid dat Gelowiges sensitief sal raak vir die oortuiging van die Heilige Gees.

Gebedsfokus op die Wêreldbekersokertoernooi: God se teenwoordigheid

Bid dat God se teenwoordigheid alle persone sal aanraak soos hulle deur ons land reis. Bid dat hulle bewus sal raak van God se heiligheid, wat hulle sal oortuig om hulle lewens te verander.

Vrydag 9 April 2010

Gebedsfokus op die Wêrelddag van Gebed: Bid vir Marokko, Mosambiek en Mianmar (Burma). Vra vir ontvanklikheid vir die evangelie.

Dag 7: Onthou die fontein van herlewing van ouds

📖 Johannes 4:10-14: *Jesus het haar geantwoord: "As jy geweet het wat God gee, en wie dit is wat vir jou sê: 'Gee My 'n bietjie water om te drink,' sou jy Hom gevra het, en Hy sou vir jou lewende water gegee het." Die vrou sê toe vir Hom: "Meneer, jy het nie eens 'n skeping nie, en die put is diep. Waar gaan jy die lewende water vandaan kry? ... Maar Jesus antwoord haar: "Elkeen wat van hierdie water drink, sal weer dors kry; maar wie van die water gedrink het wat Ek hom sal gee, sal in alle ewigheid nooit dors kry nie. Nee, die water wat Ek hom sal gee, sal in hom 'n fontein wees met water wat opborrel en vir hom die ewige lewe gee." **Johannes 7:38-39:** "Met die een wat in My glo, is dit soos die Skrif sê: Strome lewende water sal uit sy binneste vloei." Hiermee het Hy na die Gees verwys, want die mense wat tot geloof in Hom kom, sou die Gees ontvang. Die Gees was nog nie uitgestort nie, omdat Jesus toe nog nie verheerlik was nie.*

❖ Voel dit vir jou asof jy in 'n geestelike woestyn is? Jesus het belowe dat, as ons van Sy water drink, ons nooit weer sal dors hê nie. Een manier om van Hom te drink, is om die Woord te lees en oor die waarhede daarin na te dink. Vra dat die Heilige Gees die Woord van God vir jou sal oopmaak, sodat jou gees van die waters van die lewe kan drink. Bid dat die Kerk na die Woord van God as die absolute waarheid sal terugkeer en dat die Woord van God ons optrede, gedagtes en verhoudings met ander mense sal rig. Bid dat lewende water weer uit die Kerk sal vloei om ook die ongelowiges in ons nasie aan te raak.

Saterdag 10 April 2010

Dag 8: Onthou die fontein van herlewing van ouds

📖 Hooglied 4:12-15: *"My beminde bruid is 'n tuin wat toegemaak is, 'n tuin met 'n muur om, 'n fontein wat afgekamp is. Jou liggaam is 'n lushof, granaatbome met keurige vrugte, hennastruik saam met nardus, nardus en*

saffraan, kalmoes en kaneel saam met elke soort lekkerruik-kruie, mirre en aalwyn saam met al die beste lekkerruik-kruie. Daar is 'n fontein in my tuin, 'n put met borrelende water, strome van die Libanon af."

❖ Die Kerk van Christus is veronderstel om oorvloedig vrug te dra. Jesus self het gesê dat as die takke nie vrugte dra nie, die Vader dit sal snoei. Laat die Heilige Gees toe om jou lewe te ondersoek. Toon berou oor enige dade wat nie vrug gedra het nie. Onderwerp jou aan die snoeiproses van die Heilige Gees, wat tot gevolg sal hê dat jy groot vrug sal dra. Bid vir diegene by wie die saad gesaai is tydens die herlewings van die verlede en deur die prediking van sendelinge, Bybelonderwysers en pastore wat onder ons nasies gewerk het en steeds werk. Nooi die hemelse Bruidegom uit om Sy Kerk te besoek en behae in haar te vind.

Gebedsfokus op die Wêreldbekersokkertoernooi: Godvresende ondernemings

Bid vir almal in die land wat hoop om finansiëel by die toernooi te baat. Vra dat hulle hulle ondernemings met eerlikheid sal bedryf en nie aan versoekings soos hebsug, selfsug of uitbuiting sal toegee nie. Bid dat besigheidsmense met mekaar sal skakel en ook mekaar sal ondersteun deur besigheidsgelentede met mekaar te deel.

Sondag 11 April 2010

Dag 9: Onthou die fontein van herlewing van ouds

📖 **Numeri 21:16-18:** *Daarvandaan het Israel verder getrek tot by Beër. Dit is die Beër waar die Here vir Moses gesê het: "Laat die volk bymekaarkom en Ek sal vir hulle water uit die put gee." Israel het toe hierdie lied gesing: "Put, lewer jou water, en ons sal daarvan sing! Put wat deur leiers gegrawe is, wat deur vernames van die volk oopgemaak is met septer en kiere."*

❖ Aanbidding sal die fontein van lewende water oopmaak. Ons moet leer om te aanbid totdat ons tot God deurbreek. Herlewing is die herstel van aanbidding, gemotiveer deur liefde en opoffering. Ons gewilligheid om onself aan Hom oor te gee, raak God se hart aan. Aanbidding moet op God, Sy karakter en Sy werke fokus. Verhef jou hart en siel tot die Een wat ons aanbidding waardig is. Bid ook vir die herstel van aanbidding in die Kerk en dat die fokus weer op God sal wees en nie net op onself en ons behoeftes nie.

Maandag 12 April 2010

Dag 10: Onthou die fontein van herlewing van ouds

📖 **Esegïel 47:9, 12:** *Waar die stroom ook kom, sal dit wemel van al die soorte diere en sal daar baie vis wees. Die water loop af na die Dooie See toe en sal die see vars maak. Waar die stroom kom, sal alles lewe ... Weerskante op die wal van die stroom sal allerlei vrugtebome groei. Hulle blare sal nie verlep nie en hulle vrugte sal nie opraak nie. Hulle sal elke maand dra, want die stroom se water kom uit die heiligdom. Die vrugte sal daar wees om te eet en die blare om genesing te bring.*

❖ Die uitstorting van God se guns en genade op die Kerk sal outomaties elke aspek van ons samelewing beïnvloed. Wanneer die Kerk in die regte verhouding met God staan, sal die nasie genesing ervaar. Vra dat die Kerk in ons nasie weereens 'n weerspieëling van die hart en ontferming van Jesus sal wees. Bid dat God jou as 'n instrument sal gebruik om heling vir mense om jou te bring.

Gebedsfokus op Israel: Herdenking van die Holocaust

Dit word bereken dat ses miljoen Jode tydens die Tweede Wêreldoorlog in Europa gesterf het. Daar is vandag nog ongeveer 250 000 oorlewendes in Israel, hoofsaaklik bejaardes in geldelike nood, en wat steeds verpletter is deur hulle ervaring. *Forsake them not* is 'n bediening wat na hierdie mense uitreik om hulle op verskillende maniere te help. Bid dat hulle ontvanklik sal wees om God se liefde in hulle harte te ontvang, en heling en bevryding van hulle trauma te kry. (*Christian Friends of Israel*. Tel. en faks: 012 361 1437. Webruimte: <http://www.cfjerusalem.org/> of e-pos: allwiese@lantic.net).

Gebedsfokus: Herlewing – 13 April – 12 Mei

Ps.69:33... *dié wat by God hulp soek, sal moed skep...*


Die volgende 30 dae gaan ons spesifiek fokus op herlewing in die kerk wêreldwyd. Die gebedsaanwysings fokus op jou eie verhouding met God sowel as op die plaaslike gemeente waaraan jy behoort se verhouding met Hom. Dit is goed om vir die groter Kerk te bid, maar wanneer jy bid, bid dat die mense wat jy ken, nuut sal word en nuut sal leef.

1. Begeer met jou hele hart dat die Here jou weer sal vernuwe.
2. Laat jou hart stil word voor Hom en stel jou hart oop vir die Gees van God om in jou en deur jou te werk.
3. Stop na elke Skrifverwysing en gebedsverzoek en laat die Woord toe om jou ontvanklik vir God se teenwoordigheid te maak, voordat jy bid.
4. Na jou gebed, raak stil voor die Here en wag op die Heilige Gees om met jou te praat en in jou hart te werk.


Dinsdag 13 April 2010


Gebedsfokus op die *Wêrelddag van Gebed*: Bid vir Namibië, Nauru, Nepal en Nederland. Bid vir die totstandkoming van gebedshuise.

Dag 1: Gebedsfokus op herlewing: God praat

 **Hebreërs 1:1-2:** *In die verlede het God baie keer en op baie maniere met ons voorvaders gepraat deur die profete, maar nou, in hierdie laaste dae, het Hy met ons gepraat deur die Seun.*

 **Oordenking:** Watter taal gebruik God? Hoe praat Hy vandag met ons?


 **Persoonlik:** Verklaar dat jy glo dat God vandag steeds kan praat en wel praat. Vertel Hom van jou begeerte dat Hy persoonlik en verstaanbaar met jou moet praat. Vra dat die Heilige Gees aan jou bekend moet maak hoe God met jou praat. Vra dat Hy Homself aan jou sal openbaar deur Sy Woord, Jesus Christus.


 **Gemeente:** Bid dat God se stem oor jou gemeente sal weerklink. Vra dat die mense se ore ingestel sal wees om na Sy stem te luister.


Woensdag 14 April 2010


Gebedsfokus op die *Wêrelddag van Gebed*: Bid vir Nederlands-Antille, Nieu-Kaledonië en Nieu-Seeland. Vra vir die redding van leiers op alle terreine van die samelewing.

Dag 2: Gebedsfokus op herlewing: God praat

 **Hebreërs 1:1-2:** *In die verlede het God baie keer en op baie maniere met ons voorvaders gepraat deur die profete, maar nou, in hierdie laaste dae, het Hy met ons gepraat deur die Seun.*

 **Oordenking:** Is daar 'n verskil tussen wanneer God deur die profete praat en wanneer Hy deur Jesus praat?

 **Persoonlik:** Weet jy wat dit beteken dat God deur Sy Seun met jou praat? Spreek jou begeerte uit dat God deur Jesus met jou moet praat. Onderwerp jouself aan die leiding van die Heilige Gees wanneer Hy die Seun aan jou bekend maak.

 **Gemeente:** Bid dat die Heilige Gees oor julle gemeente sal sweef soos Hy in die begin oor die waters gesweef het voordat God lig gespreek en die hele skepping tot stand gekom het.

Donderdag 15 April 2010

Gebedsfokus op die *Wêrelddag van Gebed*: Bid vir Nicaragua, Niger, Nigerië en Noord-Korea. Vra dat God se wil op aarde sal geskied, net soos in die hemel.

Dag 3: Gebedsfokus op herlewing: Die heerlikheid van die Seun

📖 Hebreërs 1:2-3: ... die Seun. God het Hom deur wie Hy die wêreld geskep het, ook erfgenaam van alles gemaak. Uit Hom straal die heerlikheid van God en Hy is die ewebeeld van die wese van God. Hy hou alle dinge deur sy magswoord in stand.

🔗 Oordenking: Hoe kwalifiseer Jesus om deur God aangewys te word om Hom by die mense te verteenwoordig?

👤 Persoonlik: Hunker jy daarna om deel te hê aan die verhouding tussen die Vader en die Seun? Verwoord hierdie verlange in 'n gebed tot Jesus om een met Hom te wees.

♥ Gemeente: Bid dat die lidmate van jou gemeente 'n honger sal ontwikkel om God intiem te ken en met Hom een te wees soos wat Hy beloof het.

Vroue wat bid: Tyd om vir ons mans te bid

Die Here is die afgelope drie jaar besig om iets baie spesiaals onder die mans in ons land te doen. Baie mans gee hulle lewens aan die Here oor en gaan terug na hulle huise om hulle priesterlike rolle op te neem. Dit is 'n uitdaging vir ons as vroue omdat sommige van ons nog nooit gesien het dat ons mans hulle goddelike posisie in ons huise opneem nie. Hoe weet ons of dit eg is? En hoe maak ons nou vir hulle ruimte en hoe bid ons vir hulle? Die volgende is 'n paar riglyne wat jou dalk kan help om te bid vir die mans van ons land en die man in jou lewe. (Kyk ook die artikel oor Mans wat bid).

- Bid vir mans wat hulle lewens aan die Here oorgegee het om vriende te vind en by gebedsgroepe vir mans aan te sluit wat hulle sal aanmoedig, mentor en onderrig om te groei as dissipels van Jesus.
- Bid vir elke man om weer sy eie vrou so lief te hê soos sy eie lewe en liggaam, om haar te voed en te koester soos Christus die Kerk liefhet en dat elke man homself vir sy vrou en kinders sal gee soos Jesus vir die Kerk gedoen het.
- Vra dat hulle die gesinsaltaar sal herstel, dat elke man sy vrou sal heilig en reinig met die was van water deur die Woord en haar sal aanmoedig om God se roeping op haar lewe te vind en te volg.
- Bid ook dat mans die wyse waarop hulle hulle geld en tyd spandeer sal heroorweeg, veral die wat getroud is, dat elkeen met sy vrou sal deel hoe hy hulle geld spandeer en dat hulle saam vir hulle maandelikse uitgawes sal begroot (**Ef.5:26-30**).
- Bid dat die Here mans sal help om hulle los te maak van familie-kwessies en met hulle vrouens en kinders verenig te word soos die Here dit beplan het (**Ef.5:31**).
- Bid dat mans hulle vrouens sal liefhê en nie verbitterd teenoor hulle sal wees oor enigiets nie, dat hulle in staat sal wees om die oortredings van hulle vrouens te vergewe en met 'n nederige hart hulle eie verkeerde dade sal regmaak (**Ef.5:33**).
- Bid dat vaders nie hulle kinders sal terg en die lewe vir hulle onaangenaam sal maak nie, negatief sal wees en altyd hulle kinders kritiseer nie, maar hulle op 'n godvresende manier sal dissiplineer, sal aanmoedig om hulle God-gegewe identiteit, gawes en talente uit te leef (**Kol.3:20-21**).
- Bid dat mans hulle priesterlike rol sal vervul en 'n voorbeeld vir hulle kinders sal wees in die wyse waarop hulle hulle vrouens hanteer as die swakker geslag sodat hulle kan bid sonder dat iets hulle hinder (**1 Pet.3:7-8**).

- Bid vir mans om die gesindheid van Christus te hê, om medelye vir mekaar te hê, om mekaar lief te hê soos broers, om goedhartig en nederig te wees, om nie kwaad met kwaad te vergeld nie, maar om eerder 'n seën vir ander te wees (**1 Pet.3:8-9**).
- Vra dat mans die lewe op die Here se manier sal liefhê, hulle tonge sal weerhou van vuil praatjies, kwaadpraat en leuens, dat hulle weg sal bly van dinge soos omkoopgeskenke aanneem ter wille van 'goeie' sake-transaksies en dat hulle nooit betrokke sal wees by enige twyfelagtige of onregverdigde sake-transaksies nie (**1 Pet.3:10-11**).

Dank die Here dat Hy die harte en lewens van so baie mans in ons land aanraak. Dank Hom vir die antwoorde op gebede van baie ouers, vrouens en kinders oor die jare.

Vrydag 16 April 2010

Gebedsfokus op die Wêrelddag van Gebed: Bid vir Noorweë, Oman, Pakistan en Panama. Bid dat Jesus Homself in gesigte en drome aan mense sal openbaar.

Dag 4: Gebedsfokus op herlewing: Die heerlijkheid van die Seun

📖 **Hebreërs 1:2-3:** ...die Seun. God het Hom deur wie Hy die wêreld geskep het, ook erfgenaam van alles gemaak. Uit Hom straal die heerlijkheid van God en Hy is die ewebeeld van die wese van God. Hy hou alle dinge deur sy magwoord in stand.

🔗 **Oordenking:** As Jesus die ewebeeld van die Vader is, kan ons dan die ewebeeld van Jesus wees? By implikasie – as die heerlijkheid van God uit Jesus straal, moet die heerlijkheid van Jesus dan nie uit ons straal nie?

👤 **Persoonlik:** Glo jy dat God Sy natuur op jou wil afdruk deur 'n persoonlike, intieme verhouding met Hom? Sê vir Hom dat jy verlang om die onsigbare heerlijkheid van God deur Sy werk in jou te sien, om jou sodoende te herskep na die beeld van Sy Seun.

♥ **Gemeente:** Bid dat jou gemeente die heerlijkheid van God so sal uitstraal dat die hele plaaslike gemeenskap Hom sal sien.

Saterdag 17 April 2010

Dag 5: Gebedsfokus op herlewing: Geregtigheid en vreugde

📖 **Hebreërs 1:8-9:** Maar van die Seun sê Hy: "U troon, o God, staan vir ewig vas, met u koninklike septer laat U reg geskied. U het die reg lief en U haat die onreg. Daarom het God, u God, U onder groot vreugde tot Koning gesalf bo u tydgenote."

🔗 **Oordenking:** Geregtigheid is hoe God ons karakter toets aan Sy standaard van reg en verkeerd. Wat beteken die woord "karakter" vir jou? Hoe het Jesus karaktergewys aan God se standarde voldoen?

👤 **Persoonlik:** Kan jy eerlik sê dat vreugde die oorweldigende, aanhoudende toestand van jou siel is? Indien nie, het jy jou al ooit onderwerp aan God se evaluering van die toestand van jou siel? Wil jy dit nie nou doen en Hom vertrou om jou van enige ongeregtheid te oortuig nie?

♥ **Gemeente:** Die karakter van die Kerk is die weerspieëling van die gemeenskaplike reaksie van die gemeentelede teenoor God self. Bid dat gemeentelede sal reageer op die Heilige Gees se verlange om mense na God te trek.

Sondag 18 April 2010

Dag 6: Gebedsfokus op herlewing: Waarskuwing teen die verwaarlosing van jou redding

📖 **Hebreërs 2:1-4:** Om hierdie rede moet ons soveel kragtiger vasgryp aan wat ons gehoor het, sodat ons nie dalk wegdrywe nie. As die woord wat deur engele gepraat is, bindend was, en elke oortreding en ongehoorsaamheid regmatig gestraf is, hoe sal ons dan ontkom as ons so 'n groot saligheid verontagsaam het? Hierdie saligheid is immers deur die Here verkondig, deur wie dit sy oorsprong het, en is aan ons bevestig deur

dié wat dit gehoor het. Daarby het God ook saam getuig deur tekens en wonders en ook deur allerhande kragtige dade en gawes van die Heilige Gees, soos Hy dit toebedeel het volgens sy wil.

⚙️ **Oordenking:** Die redding van mense is God se grootste prioriteit. Om dit te kon vermag, het Hy die hoogste prys betaal, die offer van Sy Seun. Waarom, dink jy, is die redding van mense so belangrik vir God?

👤 **Persoonlik:** Die inwoning van die Heilige Gees in ons is die oortuigende bewys van ons redding. Redding is nie iets wat ligtelik opgeneem moet word nie, maar is die herstel van die eer en heerlijkheid van God se roem onder die nasies. Bring jou lewe hierdie eer aan Hom? Indien nie, buig voor Hom neer en vra vir die getuienis van die Heilige Gees in en deur jou lewe.

♥️ **Gemeente:** Baie lidmate van die Kerk is net Christene in naam, nie in leefwyse nie. Bid dat elke gemeentelid deur die Heilige Gees oortuig sal word, tot ware redding en om kragtige getuies vir Hom te wees.

Gebedsfokus op Turkye: Internasionale Dag van Gebed vir Turkye

Na die wrede moord op drie mans in die stad Malatia op 18 April 2007, het Gelowiges in Turkye besluit om wêreldwyd 'n oproep op die liggaam van Christus te doen om elke jaar op 18 April by hulle aan te sluit om te bid vir die kerk en die land/mense van Turkye. Bid vandag dat die Kerk in Turkye gesalf en versterk sal word om God te verheerlik. Vra dat baie Turke as gevolg hiervan hulle lewens in en deur Jesus Christus aan God sal oorgee. (Webruimte: http://www.sbpres.com/Site_2/Home/Entries/2009/4/17_EPs_Missive_Feb_March_2009.html).

Maandag 19 April 2010

Dag 7: Gebedsfokus op herlewing: Uit die dood kom lewe

📖 **Hebreërs 2:9:** *Maar ons sien Jesus, met eer en heerlijkheid gekroon op grond van sy lyding en dood. Hy is 'n kort tydjie minder gemaak as die engele, sodat Hy deur die genade van God vir almal sou sterwe.*

⚙️ **Oordenking:** Net soos duisternis gemeet kan word aan die afwesigheid van lig, net so kan dood slegs gedefinieer word deur die afwesigheid van lewe. Omdat God Lewe is, moet dood dus die afwesigheid van God beteken. Toe Jesus "die dood geproe" het, beteken dit dat Hy die volle implikasies daarvan ervaar het om namens ons heeltemal van God geskei te wees, sodat ons nooit nodig sal hê om die verskrikking van hierdie ewige "dood" te ervaar nie.

👤 **Persoonlik:** Jesus se dood beteken die ewige lewe vir ons almal. Het jy Hom al ooit gedank vir hierdie geweldige, onverdiende geskenk: om nooit die ware dood te ervaar nie (die afwesigheid van God), maar om lewe vir ewig te proe (onbeperk, ononderbroke intieme nabyheid by God)? Vra dat die Heilige Gees jou na die kruis sal bring om die volle krag van Jesus se dood te ervaar: die oorwinning oor sonde en vrees vir die dood.

♥️ **Gemeente:** Bid vir 'n dieper, ware begrip in die Kerk van wat "redding uit die dood" beteken, en dat mense bereid sal wees om deel te hê aan Sy lyding, sodat die heerlijkheid van Jesus in die Kerk geopenbaar kan word.

Gebedsfokus op redding: Kapers

Dra elke persoon wat voertuie kaap, in gebed aan die Here op. Vra dat God herhaaldelik op 'n bonatuurlike wyse tydens hulle pogings sal ingryp, sodat hulle Jesus sal leer ken as die Here van hulle lewens, veral deur die getuienis van diegene wat deur hulle gekeer word.

Beplan vooruit vir die *Wêreld Biddag van Gebed* op 23 Mei 2010: Webruimte: www.globaldayofprayer.com

Dinsdag 20 April 2010

Gebedsfokus op die Wêrelddag van Gebed: Bid vir Papoea Nieu-Guinee, Paraguay, Peru en die Filippyne. Vra dat invloedryke leiers na Jesus sal draai.

Dag 8: Gebedsfokus op herlewing: Die Leidsman tot ons verlossing

📖 **Hebreërs 2:10, 17:** *God, ter wille van wie alles bestaan en deur wie alles ontstaan het, wou baie deel laat kry aan sy heerlijkheid. En daarom was dit reg dat Hy hulle Leidsman tot die verlossing deur lyding heen tot*

volmaaktheid sou bring ... Daarom moes Hy in elke opsig aan sy broers gelyk word, sodat Hy 'n barmhartige en getroue Hoëpriester voor God kon wees om die sondes van die volk te versoen.

📖 **Oordenking:** God die Vader moes Jesus "toets" deur Hom toe te laat om deur al die lyding te gaan waaraan mense blootgestel word. Jesus het hierdie "toets" geslaag deur getrou te wees te midde van versoekings, selfs tot op die punt dat Hy Sy eie wil en lewe afgelê het. As gevolg van hierdie getrouheid, vertrou die Vader Hom volkome vir my en jou redding.

👤 **Persoonlik:** Ken jy Jesus persoonlik as die Leidsman tot jou verlossing? Weet jy dat die Vader Hom verantwoordelik gemaak het vir jou redding? Is jy bereid om Hom te vertrou om jou tot volkome saligheid te lei, wat beteken dat jy jou eie wil en lewe moet aflê? Plaas jouself in Sy hande en gee jou lewe aan Hom oor.

♥ **Gemeente:** Bid dat die lidmate van jou gemeente 'n diep persoonlike, lewensveranderende ontmoeting met Jesus as hulle Verlosser sal hê, die enigste Een wat God met die redding van die mensdom kon vertrou.

Woensdag 21 April 2010

Gebedsfokus op die Wêrelddag van Gebed: Bid vir Pole, Portugal, Porto Rico en Katar. Bid vir 'n honger en dors om te bid en God se Woord te bestudeer en te verkondig.

Dag 9: Gebedsfokus op herlewing: Oorwinning oor sonde!

📖 **Hebreërs 2:16-18:** *Dit is duidelik dat dit vir Hom nie om die engele gaan nie, maar om die nageslag van Abraham. Daarom moes Hy in elke opsig aan sy broers gelyk word, sodat Hy 'n barmhartige en getroue Hoëpriester voor God kon wees om die sondes van die volk te versoen. Omdat Hy self versoek is en gely het, kan Hy dié help wat versoek word.*

📖 **Oordenking:** Jesus kry nie skaam en word nie in die verleentheid gebring deur enige mens nie. Hy weet presies waardeur ons in hierdie lewe gaan. Hy verstaan elke sonde, elke mislukking, elke versoeking, elke emosie en elke verlies. Hy het Homself gegee sodat ons gehelp kan word om alle sonde, versoeking en pyn te oorkom. Ons kan altyd op Hom vertrou om ons te help.

👤 **Persoonlik:** Jesus deel in jou lyding en wil hê jy moet deel in Sy vreugde en liefde vir die Vader. Hy is jou Broer. Hy kan jou na die Vader neem en aan die Vader voorstel. Kan jy Hom vertrou om jou te help wanneer jy in die versoeking is? Hy wil jou vertrou met Sy hulp wen. Gee jouself en jou stryd om sonde te oorwin, aan Hom oor. Laat Hom toe om jou te oortuig en jou tot inkeer te bring.

♥ **Gemeente:** Bid dat Christene sal beseft dat Jesus daar is om ons te help om elke versoeking om sonde te doen, te oorwin. Hy het dit oorwin, dus weet Hy hoe om ons te help om ook te oorwin. Bid dat ons as die Kerk Hom sal vertrou om ons te help om sonde en versoeking te oorkom, en nie 'n kompromie met die wêreld aan te gaan as gevolg van ons eie onvermoë om sonde met wilskrag alleen te oorwin nie.

Donderdag 22 April 2010

Gebedsfokus op die Wêrelddag van Gebed: Bid vir Réunion, Roemenië, Rusland en Rwanda. Bid dat mense God se stem sal hoor, daarna sal luister en dit sal gehoorsaam.

Dag 10: Gebedsfokus op herlewing: Oorwinning oor Satan!

📖 **Hebreërs 2:14-15:** *Aangesien hierdie kinders mense van vlees en bloed is, het Hy ook net soos hulle mens geword. Dit het Hy gedoen om deur sy dood dié een wat mag het oor die dood, dit is die duiwel, te vernietig en om hulle wat uit vrees vir die dood hulle hele lewe lank in slawerny was, te bevry.*

📖 **Oordenking:** Satan se mag kom a.g.v. God se oordeel oor die sonde. Sonde verdien die dood en daarom het die dood mag. Satan mislei mense om te glo dat hulle magteloos is in die aangesig van die dood. Deur die straf van die dood weg te neem, het God Satan se mag oor mense verbreek. Diegene wat in Jesus glo, hoef nie die dood te vrees nie, want die dood is net 'n deur na die ewige lewe.

👤 **Persoonlik:** Is jy bang om dood te gaan? Waarom nie jou lewe oorgee in die hande van Jesus met die volle versekering dat jy die ewige lewe sal hê nie? Vertrau Hom om jou volkome van alle vrees te bevry en om die ewige lewe 'n werklikheid vir jou te maak. Bid om van alle boosheid in jou lewe verlos te word.

♥ **Gemeente:** Bid dat die Kerk sal verstaan wat dit beteken dat die mag van Satan en die vrees vir die dood verbreek is. Bid dat ons as Christene sal verstaan dat ware mag verkry word deur op Jesus te vertrou vir die ewige lewe en om bereid te wees om ons lewens vir Hom af te lê, sodat ander van die bindinge van Satan verlos kan word.

Vrydag 23 April 2010

Gebedsfokus op die Wêrelddag van Gebed: Bid vir Sint Pierre en Miquelon, Samoa en San Marino. Vra vir 'n toename in dag-en-naggebede in elke gehuggie, dorp en stad.

Dag 11: Gebedsfokus op herlewing: Kyk op na Jesus!

📖 **Hebreërs 3:1:** *Daarom, broers wat vir die Here afgesonder is en deelgenote is van die hemelse roeping, moet julle noukeurig let op Jesus, die Apostel en Hoëpriester van die geloof wat ons bely.*

🔗 **Oordenking:** Die geheim van die Christelike lewe is geloof wat op Jesus gefokus is. Dit behels om ons harte op Hom in te stel en Hom te vertrou vir die vervulling van al God se beloftes. Dit is om te glo dat, ten spyte van al ons swakhede en sonde, Jesus in staat is om 'n heerlike transformasie in ons te bewerkstellig. Maar dan moet Hy die middelpunt en fokus van ons geloof wees.

👤 **Persoonlik:** Baie mense se geloof in Jesus is net daarop gemik om eendag "hemel toe te gaan". Hulle begryp nie dat geloof 'n lewende, elke-oomblik-van-die-dag-interaksie met Jesus is nie. Met betrekking tot Jesus, beteken dit dat jy jou hart en gedagtes op Hom rig en op Sy vermoë om jou meer as 'n oorwinnaar te maak. Hy wil jou 'n deelgenoot maak van Sy hemelse roeping. As jy dit begeer, moet jy vroeg-oggend jou hart op Hom instel en so gereeld as moontlik deur die dag, en dit moet die laaste ding wees wat jy doen voordat jy saans gaan slaap.

♥ **Gemeente:** Bid dat die Kerk sal terugkeer na die feit dat Jesus die Kern van ons geloof is. Bid dat mense sal begeer om Hom te leer ken vir wie Hy werklik is.

Saterdag 24 April 2010

Dag 12: Gebedsfokus op herlewing: Vul jou siel met Sy heerlijkheid

📖 **Hebreërs 3:2-3:** *Hy is getrou aan God wat Hom aangestel het, soos ook Moses getrou was in die hele huis van God. Maar Jesus is groter heerlijkheid waardig geag as Moses, net soos die een wat 'n huis bou, meer eer waardig is as die huis.*

🔗 **Oordenking:** Jesus se heerlijkheid is gegrond op wat die Vader van Hom dink. Jesus se getrouheid is bewys en daarom het God Hom verhef tot die hoogste ereposisie. Ons word nou genooi om hierdie vertroue wat God in Jesus stel, te reken as die versekering dat Jesus vir ons kan doen wat God van Hom verwag – om ons na die Vader te lei.

👤 **Persoonlik:** Ons reaksie op die vertroue tussen God die Vader en Jesus is om Hom te aanbid. Kyk op na Jesus en aanbid Hom tot jou hele siel gevul is met die kennis van Sy getrouheid aan die Vader en aan jou. Laat hierdie heerlike werklikheid jou hart vervul met volkome vertroue in Hom.

♥ **Gemeente:** Bid dat Jesus se getrouheid die Kerk met hoop sal vervul, sodat die Kerk weer in die waarheid van God en Sy Woord sal glo. Bid dat die Kerk 'n nuwe vlak van geloof en gehoorsaamheid sal bereik.

Sondag 25 April 2010

Dag 13: Gebedsfokus op herlewing: Die sonde van ongeloof

📖 **Hebreërs 3:12:** *Broers, julle moet toesien dat daar nooit by een van julle 'n verkeerde gesindheid van ongeloof ontstaan en hy van die lewende God afvallig word nie.*

🔗 **Oordenking:** Alle ongeloof is sonde. Ongeloof is nie iets wat as 'n swaakteit geduld kan word nie. 'n Ongelowige hart het tot so 'n mate gevul geraak met duisternis dat die persoon God buite rekening begin laat en Hom tot leuenaar maak. Ongeloof mag geen plek in ons harte hê nie.

👤 **Persoonlik:** Die manier om ongeloof teen te werk, is om na God te draai in die volle vertroue dat Hy is wie Hy sê Hy is. As jy vermoed dat ongeloof besig is om in jou hart in te kruip, begin dan dadelik om Hom in stilte te

aanbid en die waarheid uit te spreek oor wie Hy is. Sê vir God dat jy glo dat Hy die Waarheid is en dat alles wat Hy sê, die Waarheid is. Laat jou hart toe om die teenwoordigheid van die lewende God te ervaar. Hoe meer jy dit doen, hoe meer sal jou hart met geloof vervul word.

♥ **Gemeente:** Ongeloof ontstaan ook as gevolg van te min gemeenskap met God. Bid dat jou mede-gemeentelede gemeenskap met God sal hê deur gereelde gesamentlike en individuele gebed. Voortdurende gesprekke met God, veral om te leer om Sy stem te hoor, stimuleer geloof.

Gebedsfokus op die Internet: *Internet-evangelisasiedag*

Vandag is *Internet Evangelism Day*, die jaarlikse web-bedieningsfokusdag vir kerke. Doen vandag ekstra moeite om mense aan te moedig om te bid vir die impak van die Internet op evangelisasie, veral in geslote lande waar sendelinge nie by individue kan uitkom nie. (Webruimte: www.internetevangelismday.com)

Gebedstorie: God maak die 'venster' oop

Sedert 1993 het 'n "nuwe" vorm van gebed wêreldwyd begin posvat: gebedsreise. Met die *Bid Deur die Venster* inisiatief wat in 1993 geloods is, het ongeveer 21 miljoen mense vir die 65 lande wat binne die *10/40 Venster* lê, gebid. (Dit is lande wat geleë is tussen 10 en 40 grade Noorderbreedte, vanaf Wes-Afrika tot by Japan). Ongeveer 90% van die wêreld se onbereikte groepe woon hier. Dis waar die grootste nie-Christelike godsdienste hulle hoofsentra het en waar ook 80% van die wêreld se armste mense woon. Die gebedsinisiatief het gedurende die volle 31 dae van Oktober 1993 plaasgevind en is herhaal in 1995, 1997, 1999 en word vandag nog elke jaar gedurende Oktober gedoen.

Gedurende 1993 het 248 gebedspanne, (min of meer 4 spanne per land) op gebedsreise na hierdie 60+ lande begin gaan. In 1995 was daar baie meer spanne; 310 mense het van Suid-Afrika op gebedsreise na lande binne die *10/40 Venster* gegaan. Sedert 1996 het *Projek Masedonië* begin om spanne uit Suid-Afrika na hierdie lande te stuur, meestal lande in Noord-Afrika en die Midde-Ooste; letterlik honderde spanne. Hulle is nie die enigste groep wat bidders uitgestuur het nie, maar 'n groot aantal spanne is deur hulle opgelei en uitgestuur. Dossyne spanne het Morokko, Egipte en die meeste lande in die Midde-Ooste en Noord-Afrika begin besoek.

Na een spesifieke land in die Midde-Ooste is daar altesaam 88 spanne gestuur. Verlede jaar het die organiseerders by die punt gekom waar hulle daaraan begin dink het om nie meer spanne te stuur nie, want dit het net gelyk asof daar nie enige vordering in hierdie land is nie. En toe kom die deurbraak: op "onverklaarbare" wyse het mense net begin vra hoe hulle Jesus as verlosser kan aanneem. Voorheen het dit soms 20-30 gesprekke gekos voordat iemand by 'n oorgawe uitgekome het. Maar nou het die mense uit hul eie begin kom. In hierdie land het daar nou ook 'n gebedswag tot stand gekom waaraan die meerderheid Christelike organisasies in die land deelneem. Sedert die gebedswag begin het, het die deurbrake begin toeneem.

Baie mense wonder dikwels of dit die moeite werd is om op so 'n gebedsreis te gaan en in 'n spesifieke land te gaan bid. Een bidder sê: "Ek kan alleen getuig van wat dit vir myself beteken het. Ek was al op verskeie sulke gebedsreise en het elke keer versterk en baie meer bewus van die nood teruggekome." Uit die letterlik duisende mense wat oor die afgelope 15 jaar uit Suid-Afrika op gebedsreise gegaan het, is 95% positief en het die begeerte om weer te gaan. Hulle kom versterk terug en is baie intens bewus van die nood in die spesifieke land wat hulle besoek het.

Wil jy nie oorweeg om goed toegerus te word en saam met so 'n span te gaan nie? Oor die volgende twee jaar is daar een spesifieke land waarheen ons vertrou om 100 gebedspanne te stuur. En meer as 'n 100 na ander lande. As jy belangstel, kontak *Masedonië Projek* by: Privaatsak X07, Lynnwoodrif, 0040. Tel.: 012 348 6520/1 of faks: 012 348 6329. Webruimte: <http://www.macedonian.org.za/contact.html> of e-pos: macsa@mweb.co.za

Maandag 26 April 2010

Dag 14: Gebedsfokus op herlewing: Moenie jou hart verhard nie

📖 **Hebreërs 3:13:** *Maar solank daar nog 'n "vandag" is, moet julle mekaar elke dag aanspoor sodat niemand van julle deur die misleiding van die sonde verhard word nie.*

⚙️ **Oordenking:** Die eerste vereiste vir intimiteit met God, is 'n sagte en gevoelige hart wat met onmiddellike gehoorsaamheid aan God se wil reageer. Hierdie openheid vir God kan verlore gaan as ons toelaat dat wêreldse dinge soos sorg, rykdom en plesier ons harte weglok en veroorsaak dat ons ons fokus weg van God na onself verskuif. Dan word die verhouding bloot godsdiens. Geloof word selfgenoegsaam en oppervlakkig. Die hart maak stadig toe en sluit God uit.

👤 **Persoonlik:** Is jou hart tot so 'n mate deur die wêreldse dinge geïnfiltreer dat jy nie meer vir ander omgee of lief is vir hulle nie? Het jou verhouding met Jesus koud en oppervlakkig geword, fokus jy net op jou behoeftes, jou oorlewing en jou bekommernisse? Laat die Heilige Gees toe om jou hart te ondersoek. Laat Hom toe om jou hart te versag wanneer jy nederig voor Hom staan, deur jouself gewillig aan Sy weë ondergeskik te stel, selfs al mag die proses pynlik wees.

♥️ **Gemeente:** Bid dat die Heilige Gees in jou gemeente sal beweeg om harte te oortuig van diegene wat in so 'n mate met die wêreld verstrengel geraak het dat hulle nie meer op God se stem kan reageer nie. Bid dat God se Gees die hardheid sal binnedring en dat die Kerk weer sag en buigsaam sal word in God se hande.

Gebedsfokus op redding: Skrywers van boeke en tydskrifte

Skrywers van boeke en tydskrifte het 'n geweldige invloed, dikwels op duisende mense. Bid asseblief vir die redding van skrywers van boeke. Vra dat hulle werk suiwer sal wees en vry van enigets wat heksery en goddeloosheid bevorder. Bid dat skrywers wat na Christus kom, by God sal hoor hoe hulle Sy naam kan verheerlik.

Dinsdag 27 April 2010

Gebedsfokus op die Wêrelddag van Gebed: Bid vir São Tomé en Príncipe, Saoedi-Arabië en Senegal. Vra dat mense ontvanklik vir God se waarheid sal wees.

Dag 15: Gebedsfokus op herlewing: Spoor mekaar aan!

📖 **Hebreërs 3:13:** *Maar solank daar nog 'n "vandag" is, moet julle mekaar elke dag aanspoor ...*

⚙️ **Oordenking:** Die Kerk van Christus is 'n Liggaam, nie 'n organisasie nie. Siekte by een lid affekteer en vergiftig stadigaan die hele Liggaam. God het ons 'n Liggaam gemaak sodat ons op mekaar moet staatmaak en mekaar moet versorg. As ons onself van die Liggaam afsny, sal die Liggaam ly en sal ons sterf.

👤 **Persoonlik:** Het jy so individualisties in jou verhouding met God geword dat jy nie meer omgee vir die geestelike lewe van ander om jou nie? Kritiseer jy die Kerk? Laat die Heilige Gees toe om jou hart te ondersoek. Bely enige koudheid, afsydigheid en dalk openlike woede en haat teenoor ander lidmate in die Kerk. Vra dat die Heilige Gees jou weer met die Liggaam van Christus sal verenig en dat jou begeerte sal wees om genesing, nie siekte nie, in die Kerk te bring.

♥️ **Gemeente:** Bid vir die volkome genesing van die Kerk as die Liggaam van Christus: vir die heling van verdeeldheid, wonde, onsensitiwiteit, eiegeregtigheid, rassisme en onverskilligheid jeens die lyding van sekere lede van die Liggaam.

Woensdag 28 April 2010

Gebedsfokus op die Wêrelddag van Gebed: Dra Serwië, die Seychelle-eilande, Sierra Leone en Singapoer in gebed aan die Here op. Vra dat harte na God sal draai.

Dag 16: Gebedsfokus op herlewing: Deel aan Christus

📖 **Hebreërs 3:14:** *Ons behou deel aan Christus as ons enduit volhard in die vertrouwe waarmee ons begin het.*

🔗 **Oordenking:** Die menswording van Jesus is 'n geheimenis wat aan elkeen van ons openbaar gemaak moet word. Jesus het "een van ons" geword. As ons Hom as ons Verlosser aanvaar en ons geloof in Hom bely, word ons "een met Hom". Hierdie eenheid is nie net 'n geestelike begrip nie, dis 'n lewende werklikheid. Sy lewe word my lewe. Sy vreugde is my vreugde. My pyn word Sy pyn. My lyding word Syne. Sy pyn word myne. Wat 'n wonderlike, heerlike skat!

🕊️ **Persoonlik:** Begin elke oggend deur jou geloof in Jesus te beoefen. Moenie net bid en die Woord lees nie. Begin deur jou siel te onttrek van enige ander aktiwiteit. Stel jou hart wyd oop vir die Here Jesus Christus. Word stil in Sy teenwoordigheid en luister wanneer Hy tot jou siel spreek. Bly stil totdat jou siel begin om op Hom te reageer. Dit sal tyd neem aan die begin, maar oefen totdat jou siel hom in jou eenwees met Hom verbly.

♥️ **Gemeente:** Bid dat die Kerk na haar roeping sal terugkeer – om die Bruid van Christus te wees. Bid dat daar 'n steeds sterker verlange by die gesamentlike Liggaam sal wees om met Christus te verenig in alle sake rakende elke Gelowige se verstand, gees en siel.

Donderdag 29 April 2010

Gebedsfokus op die Wêrelddag van Gebed: Bid vir Slowakye, Slowenië, die Solomoneilande en Somalië. Vra vir 'n ontvanklikheid vir die evangelie.

Dag 17: Gebedsfokus op herlewing: Gaan in

📖 **Hebreërs 4:8-11:** *As Josua hulle in die rus laat ingaan het, sou God nie daarná nog van 'n ander dag gepraat het nie. Daar wag dus nog steeds 'n sabbatsrus vir die volk van God, want elkeen wat in die rus van God ingaan, rus van sy werk, net soos God van Syne. Laat ons ons dan beywer om in daardie rus in te gaan, sodat niemand hulle voorbeeld van ongehoorsaamheid navolg en ook omkom nie.*

🔗 **Oordenking:** Die Israeliete het genoeg geloof gehad om Egipte te verlaat, maar nie genoeg geloof om Kanaän binne te gaan nie. Op dieselfde wyse kan ons dalk genoeg geloof hê om in Jesus te glo vir die ewige lewe, maar nie genoeg geloof om die volheid van 'n lewe met God in die teenswoordige tyd te ervaar nie. Die eerste fase is om God te vertrou vir verlossing, die tweede fase is om 'n lewe van oorwinning te leef.

🕊️ **Persoonlik:** Daar is 'n verskil tussen 'n soekende geloof en 'n rustende geloof. 'n Soekende geloof glo dat Jesus kan seën en bly wag daarop. 'n Rustende geloof ervaar die vrede wat alle verstand te bowe gaan; 'n toestand waar daar geen bekommernis is nie, omdat die hart en verstand by 'n plek van algehele rus gekom het. As dit jou begeerte is, verklaar in geloof dat dit moontlik is en vertel vir Jesus dat jy hierdie plek van rus wil binnegaan.

♥️ **Gemeente:** Bid dat die Kerk verder sal gaan as om bloot te glo ten einde verlos te word, om waarlik te glo en ware oorwinning oor sonde, Satan, ongeloof en die onvermoë om God se opdrag uit te voer, te ervaar.

Vrydag 30 April 2010

Gebedsfokus op die Wêrelddag van Gebed: Dra Suid-Afrika, Suid-Korea en Spanje in gebed aan die Here op. Bid vir die totstandkoming van gebedshuise.

Dag 18: Gebedsfokus op herlewing: God se rus

📖 **Hebreërs 4:10:** *... want elkeen wat in die rus van God ingaan, rus van sy werk, net soos God van Syne.*

🔗 **Oordenking:** Ons geloof op sigself is nie God se rus nie. God self is die rus. Ons moet God se rus binnegaan deur in Hom te bly. Die enigste manier waarop ons met God kan verenig, is deur te verstaan wat dit beteken om aan Jesus vas te hou, "een met Hom" te word en Hom te vertrou om ons in God se rus in te bring. Dit is om by God te bly, en volle toegang tot Sy teenwoordigheid en liefde te hê, elke oomblik van die dag.

🕊️ **Persoonlik:** As jy nog nie hierdie diepe rus in God ervaar nie, begin dan deur met Jesus bekend te raak. Leer om jou verstand en jou emosies tot rus te bring en alle angs en laste op Hom te werp, om Hom te vertrou om die volle verantwoordelikheid te aanvaar om jou in God se rus in te lei. Sonder jou gereeld af om Hom te aanbid en vertel Hom van jou begeerte vir hierdie dieper eenwees met Hom.

♥ **Gemeente:** Bid dat elke gemeentelid 'n verlange sal hê vir die diep intimiteit van 'n ware verhouding met God. Bid dat pastore, gemeenteleiers en Bybelonderwysers hierdie dieper waarhede om in God se rus in te gaan, sal verstaan en beleef, en dit vir ander sal leer.

ARTIKEL: Die Wêrelddag van Gebed 2010

Die *Wêrelddag van Gebed* het tot gevolg gehad dat miljoene Christene verenig het vir 'n dag van verootmoediging en verenigde gebed. Op 23 Mei 2010, gaan Gelowiges weer uit al 220 lande van die wêreld verenig vir 'n dag van gebed. Uitroepe van desperate gebede vir transformasie het deur die jare uit stadions, oop sportvelde, gemeenskapsentra en privaat woonhuise weerklink. Hierdie gebede het tot die Here geroep wat die mag het om ons wêreld te transformeer en nasies met Sy heerlijkheid te vul. God is besig om in Sy enorme krag te beweeg en Hy daag ons uit om deel van hierdie reis te wees. Dit is 'n reis wat nie met ons eie belange te make het nie, maar met 'n wêreld wat desperaat smag na Sy heerlijkheid en ontfermende liefde. Dit is 'n oproep om te reageer op Sy uitnodiging in **2 Kronieke 7:14** om onself te verootmoedig, te bid, Sy aangesig te soek en van ons verkeerde weë af weg te draai. Mag Hy ons gebede hoor, ons sondes vergewe en ons land genees. Tien dae volhardende, volgehoue voorbedding tot op Pinksterdag, vind plaas voor die *Wêrelddag van Gebed*. In Suid-Afrika vorm dit deel van 40 dae van dag en nag gebed vir herlewing. Die tien dae van dag en nag gebed begin op Donderdag 13 Mei 2010. Kom ons span saam met die wêreld in hierdie *10 Dae* van gebed en ook op die *Wêrelddag van Gebed*. Mag die Here ons genade gee.

Saterdag 1 Mei 2010

Dag 19: Gebedsfokus op herlewing: Rus van werk

📖 **Hebreërs 4:10-11** ... *want elkeen wat in die rus van God ingaan, rus van sy werk, net soos God van Syne. Laat ons ons dan beywer om in daardie rus in te gaan.*

⚙️ **Oordenking:** Dit is oënskynlik twee teenoorgesteldes: "rus van werk" en "beywer om in te gaan". Rus van werk beteken nie om niks te doen nie. Dit beteken dat "besigwees vir God" nie noodwendig vir jou die vrede sal gee waarna jy soek nie. Hierdie vrede kom slegs wanneer jy geleer het om in intieme gemeenskap met God deur Jesus Christus te rus. Die strewe is om in te gaan; dit beteken om lang tye in God se teenwoordigheid deur te bring, en die Heilige Gees en Jesus toe te laat om in jou te bewerk wat jy self nie kan doen nie.

👤 **Persoonlik:** Die werk wat gedoen moet word, is om jou geloof te oefen. Om jou geloof te oefen moet jy jou in God se teenwoordigheid plaas, glo dat Hy jou hoor en op Hom wag om met jou te praat. Dan bly jy daar by Hom, terwyl jy partykeer luister, partykeer aanbid en partykeer die Woord se beloftes as't ware 'terugbid' na Hom. Here, help ons om in te gaan en U teenwoordigheid te ervaar!

♥ **Gemeente:** Bid dat God barmhartig sal wees en 'n gees van gebed op die kerk sal uitstort. Soek ander gemeentelede op en begin om saam te bid en God te soek vir jou gemeente.

Gebedsfokus op satanisme: Heksesabbat

1 Mei is gewoonlik die hoogtepunt van Beltane, 'n heksesabbat. Die verwagting in sataniese geleedere is dat die volheid van die towerkuns wat geprogrammeer is gedurende die verskeie sataniese kringlope wat plaasgevind het, tydens hierdie volmaan sal manifesteer. Laat ons met groot vertrouwe bid dat hierdie bose verwagting verydel sal word om op dié wyse die onvrugbare werk van die duisternis te openbaar (**Ef.5:11**). Bid dat God Hom sal openbaar aan diegene wat deur satanisme gevange geneem is. Bid dat hulle sal besef dat Jesus Christus werklik die Koning van konings is en hulle lewens aan Hom sal oorgee. (*Kanaan Ministries*. Posbus 15253, Panorama, 7506. Tel.: 021 930 7577, faks: 086 681 9458. Webruimte: www.kanaanministries.org of e-pos: kanaan@iafrica.com).

Sondag 2 Mei 2010

Dag 20: Gebedsfokus op herlewning: Die Woord is aktief

📖 **Hebreërs 4:12-13** *Die Woord van God is lewend en kragtig. Dit is skerper as enige swaard met twee snykante en dring deur tot selfs die skeiding van siel en gees en van gewigte en murg. Dit beoordeel die bedoelings en gedagtes van die hart. Daar is ook niks in die skepping wat vir God onsigbaar is nie; alles lê oop en bloot voor Sy oë. En aan Hom moet ons rekenskap gee.*

🔗 **Oordenking:** Die Woord van God is die swaard van die Gees. Ons verstaan dit gewoonlik binne die konteks van geestelike oorlogvoering teen die bose, maar hier is dit duidelik dat die eerste doel van die Woord is om ons harte binne te dring, en om daar die oorgeblewe duisternis in ons te konfronteer. Die Woord van God moet op so 'n wyse gelees en gebruik word dat die bedoelings van ons harte geopenbaar word. Is jy op so 'n wyse by die Woord betrokke?

👤 **Persoonlik:** Jou interaksie met God hang af van jou interaksie met Sy Woord. Die Woord is die Waarheid. Jou lewe moet by die Waarheid aangepas word. Wanneer jy die Woord lees, moet jy die Woord toelaat om jou lewe te ondersoek en jou van jou sonde te oortuig. Bely jou oortredinge en vra die Heilige Gees om jou optrede aan te pas in ooreenstemming met die Woord. Laat jou hart toe om naak en ontbloot voor God se oë te staan.

♥ **Gemeente:** In tye van herlewning kom geloofsoortuiging grotendeels wanneer die Woord in krag en in waarheid verkondig word. Bid dat die Kerk na die stewige fondament van die Woord sal terugkeer. Bid vir predikers wat die Woord sonder kompromie preek, sodat dit soos 'n swaard is wat mense se harte sal binnedring.

Maandag 3 Mei 2010

Gebedsfokus op die Wêrelddag van Gebed: Bid vir Sri Lanka, St Helena, St Kitts en Nevis en Sint-Vincent. Bid vir die redding van leiers op alle terreine van die lewe.

Dag 21: Gebedsfokus op herlewning: Jesus in die hemel

📖 **Hebreërs 4:14** *Terwyl ons nou 'n groot hoëpriester het wat reeds deur die hemele gegaan het, Jesus, die Seun van God, laat ons vashou aan die geloof wat ons bely.*

🔗 **Oordenking:** Die werk van Jesus ons Hoëpriester het 'n tweeledige doel. Op die aarde het Hy Homself aan die kruis geoffer as die Lam van God. In die hemel sit Hy aan die regterhand van God en tree op as ons Hoëpriester en Voorspraak. Dit is nodig dat ons al twee ampte verstaan. Jesus verteenwoordig ons in die hemel, maar ons moet ook weet dat ons saam met Hom regeer vanuit die hemele (**Ef.2:6**).

👤 **Persoonlik:** Bely jy gereeld dat Jesus jou Hoëpriester is? Deur dit te doen gee jy erkenning aan Hom en die werk wat Hy doen. Jou interaksie met Hom as die Hoëpriester beteken ook dat die krag van die hemelse lewe tot jou beskikking is. As jy aan hierdie belydenis vashou, sal die houvas van die sonde en van die duiwel op jou lewe verbreek word. Kyk na Jesus in die hemel. Plaas jou vertrouwe op Hom en laat jou hart by Hom bly. Sy vrede sal dan in jou hart inkom.

♥ **Gemeente:** Bid dat die Kerk die openbaring van Jesus as Hoëpriester sal ontvang. Bid dat hierdie waarheid die houding van die kerk oor sonde en Satan sal transformeer van een van tou opgooi na een waarin alle hindernisse oorkom kan word in ooreenstemming met God se beloftes.

Gebedsfokus op redding: Fabriekswerkers

Fabriekswerkers werk dikwels in skofte, wat hulle gesinslewe beïnvloed, veral wanneer hulle nagskof werk. Bid dat hulle Jesus sal vind as die antwoord en oplossing vir die praktiese probleme waarmee hulle te doen het en ook as die Verlosser van hulle lewens. Bid dat hulle lewens so verander sal word en dat hulle die Here sal verheerlik.

Dinsdag 4 Mei 2010

Gebedsfokus op die Wêrelddag van Gebed: Bid vir Sint-Vincent en die Grenadyne, Soedan and Suriname. Vra dat God se wil op die aarde gedoen sal word, net soos in die hemel.

Dag 22: Gebedsfokus op herlewing: 'n Simpatieke Hoëpriester

📖 **Hebreërs 4:15** *Die Hoëpriester wat ons het, is nie een wat geen medelye met ons swakhede kan hê nie; Hy was immers net soos ons aan versoeking onderwerp, maar Hy het nie gesondig nie.*

🔗 **Oordenking:** Jesus is bekend met al die kwessies waarvoor die mens te staan kom. Hy het dit immers self ondervind. Hy het Homself ontledig van Sy goddelike mag sodat Hy werklik mens kon word. Hy is geduldig met ons swakhede omdat Hy presies weet hoe ons voel. Sy fokus is nie in die eerste plek om te oordeel nie, maar om ons te help om ons swakhede te oorwin net soos Hy ook die sonde oorwin het. As jy jou daarop instel om hierdie waarheid te verstaan, sal jou hart vertroos word en sal jy hoop ontvang dat jy van enige vorm van sonde vrygemaak en verlos kan word.

👤 **Persoonlik:** Jesus is ons vertrouwe waardig! Al wat nodig is, is dat ek myself onvoorwaardelik en volkome aan Hom oorgee. Ek moet nooit terneergedruk of teleurgesteld oor myself word omdat ek skynbaar nie 'n sondelose lewe kan voer nie. Ek moet myself volkome aan Hom onderwerp en op geen manier Sy planne met my teenstaan nie. Wil jy jouself nie nou volkome aan Hom oorgee nie?

♥ **Gemeente:** Bid dat die Kerk 'n intense begeerte sal hê om 'n liggaam te word wat geheel en al en volkome sonder sonde is. Bid dat die Kerk ook so barmhartig en simpatiek teenoor sondaars sal wees as wat Jesus was. Laat ons ons veroordelende houding bely en die Here Jesus vra om Sy hart vir ons te gee.

Beplan vooruit vir die *Wêreld Biddag van Gebed* op 23 Mei 2010: Webruimte: www.globaldayofprayer.com